



XUNTA DE GALICIA
CONSELLERÍA DE ECONOMÍA,
EMPREGO E INDUSTRIA



CONVENIO DE COLABORACIÓN ENTRE O INSTITUTO GALEGO DE PROMOCIÓN ECONÓMICA (IGAPE) E A CORPORACIÓN VOZ DE GALICIA S.L.U, EDITORA DO XORNAL “LA VOZ DE GALICIA”, PARA O DESENVOLVEMENTO DUNHA PLATAFORMA DIXITAL DE CONTIDOS VINCULADOS Á ACTIVIDADE DO IGAPE E DOS DIFERENTES AXENTES QUE COMPOÑEN TANTO O MAPA EMPRESARIAL COMO O ECOSISTEMA INNOVADOR DA COMUNIDADE GALEGA

Santiago de Compostela, 1 de outubro de 2019



XUNTA DE GALICIA

CONSELLERÍA DE ECONOMÍA,
EMPREGO E INDUSTRIA



CONVENIO DE COLABORACIÓN ENTRE O INSTITUTO GALEGO DE PROMOCIÓN ECONÓMICA (IGAPE) E A CORPORACIÓN VOZ DE GALICIA S.L.U, EDITORA DO XORNAL “LA VOZ DE GALICIA”, PARA O DESENVOLVEMENTO DUNHA PLATAFORMA DIXITAL DE CONTIDOS VINCULADOS Á ACTIVIDADE DO IGAPE E DOS DIFERENTES AXENTES QUE COMPOÑEN TANTO O MAPA EMPRESARIAL COMO O ECOSISTEMA INNOVADOR DA COMUNIDADE GALEGA

Santiago de Compostela, 1 de outubro de 2019

REUNIDOS

Dunha parte Juan Manuel Cividanes Roger, director xeral do Instituto Galego de Promoción Económica (en adiante IGAPE), facultado para este acto en virtude da delegación de facultades do 23 de decembro de 2016 do Presidente do Igape feita pública mediante Resolución do 25 de xaneiro de 2017 (DOG nº 23, do 2 de febreiro de 2017).

Doutra parte Luis Miguel Blanco Penas, que actúa en nome e representación da Corporación Voz de Galicia, S.L.U., e intervéñen en función do cargo e no exercicio das súas facultades, en virtude da escritura de apoderamento outorgada o 26/07/2011, baixo o número 1992 do seu protocolo.

As dúas partes recoñécense mutuamente competencia e capacidade bastante para formalizar este convenio e en consecuencia,

MANIFESTAN

PRIMEIRO.- Que o Lei 5/1992, de 10 de xuño, de creación do Instituto Galego de Promoción Económica, atribúe ao Igape os obxectivos de impulso da creación de novas empresas e fomento do espírito emprendedor, o incremento da competitividade das empresas galegas a través da innovación e o desenvolvemento tecnolóxico, a atracción de investimento a Galicia, as políticas de internacionalización e o apoio á cooperación e aos proxectos colectivos de empresas galegas.

SEGUNDO.- Que o Igape é o departamento encargado de coordinar a política da Xunta de Galicia en materia de creación, consolidación, crecemento empresarial e internacionalización das empresas galegas.

TERCEIRO.- Que o Igape considera importante a utilización de instrumentos e iniciativas que posibiliten unha acción continuada de sensibilización social e de información sobre os ámbitos de actuación nos que ten atribuídas competencias.

Así, dentro das actuacións previstas para esta finalidade, atópanse todas aquelas accións de comunicación destinadas á edición e produción de publicacións, espazos na prensa escrita e dixital, programas de televisión e radio, organización de actos, conferencias e xornadas.

CUARTO.- A Corporación Voz de Galicia, S.L.U. é unha empresa dedicada á composición e á edición de prensa periódica e é a editora do xornal “La Voz de Galicia”.

A Corporación Voz de Galicia, S.L.U. publica habitualmente no seu xornal noticias e informacións de interese para a sociedade galega en xeral que contribúen á divulgación e á promoción da actividade económica, do emprendemento e da mellora da competitividade e da internacionalización empresarial, fomentando con esta publicación a difusión desta temática entre os cidadáns a través do seu xornal. A entidade considera importante o desenvolvemento na súa área informativa de temas relacionados con estas actuacións.



QUINTO.- O Igape considera de interese para a sociedade galega no seu conxunto potenciar a información e o coñecemento da situación actual da industria, da investigación, da innovación e a dinamización empresarial na comunidade autónoma tanto pola incidencia que ten para o futuro económico do país como para a vida cotiá dos cidadáns.

SEXTO.- As dúas partes entenden que é importante fomentar, promover e divulgar actividades e información específica relacionada cos ámbitos nos que se desenvolven as competencias do Instituto e das que, polo seu carácter transversal implican unha acción conxunta do Goberno galego, de xeito que a sociedade galega e os sectores económicos teñan unha percepción mellor da situación económica, das actividades desenvolvidas no ámbito da nosa comunidade autónoma e dos resultados que delas se derivan.

Dado o interese coincidente do Igape a Corporación La Voz de Galicia, S.L.U. as dúas partes acordan formalizar un convenio de colaboración coas seguintes

CLÁUSULAS

PRIMEIRA.- OBXECTO DO CONVENIO

O obxecto do convenio é establecer as condicións de colaboración entre o Igape e a Corporación Voz de Galicia, S.L.U. para informar e difundir nos seus medios contidos de interese para a sociedade galega sobre actuacións relacionadas co ámbito competencial do Instituto e dos diferentes axentes que compoñen tanto o mapa empresarial como o ecosistema innovador da comunidade galega, a través dunha plataforma dixital de contidos vinculados á actividade do Instituto e a publicación semanal, tanto nas edicións en papel como en programas de radio, das noticias máis destacadas da plataforma.

A Corporación Voz de Galicia, S.L.U. fixa a liña editorial dos citados espazos informativos atendendo aos obxectivos sinalados na cláusula segunda e responsabilizándose dos contidos publicados.

Todos os datos e informacións serán de elaboración propia e con cargo aos medios persoais e técnicos de que dispoña a empresa. Non obstante, o Igape poderá facilitar os datos que considere relevantes para a súa difusión e aqueloutros que sexan solicitados pola empresa e poderá formular en relación cos datos e informacións as observacións que considere pertinentes co fin de garantir a obxectividade e veracidade destes, as cales deberán terse en consideración.

SEGUNDA.- OBXECTIVOS DO CONVENIO

As actuacións que se especifican na cláusula primeira realizaranse desde o día seguinte ao da sinatura do convenio e ata o 15 de decembro de 2019 cos obxectivos finais de:

- Contribuír á divulgación de iniciativas e proxectos relacionados coa Industria 4.0: industrialización e fomento da fábrica intelixente.
- Achegar á cidadanía galega o coñecemento das actividades científicas e da I+D+i como factor estratéxico para a competitividade do tecido empresarial.

TERCEIRA.- CAPACIDADE

A Corporación Voz de Galicia, S.L.U. comprométese á presentación, con anterioridade á sinatura do convenio de colaboración, das certificacións de atoparse ao corrente coas obrigas tributarias estatais, coa comunidade autónoma de Galicia e coa Seguridade Social.



CUARTA.- OBRIGAS DAS PARTES

Serán obrigas do Igape:

- Achegar á Corporación Voz de Galicia, S.L.U. a cantidade de cento vinte e cinco mil euros, IVE incluído, (125.000,00 €) como compensación de parte dos gastos que lle ocasiona ao dito medio de comunicación o desempeño das actividades obxecto do convenio, dado que o Igape considera de interese apoiar a realización de tales accións, de acordo co seguinte desglose:

	ORZAMENTO TOTAL	ACHEGA IGAPE
DESENVOLVEMENTO MAQUETAS SECCIÓN TEMÁTICA	65.625,00 €	36.460,00 €
PUBLICACIÓN 8 TEMAS AO MES	106.875,00 €	59.375,00 €
COMPARTIR EN REDES SOCIAIS	44.375,00 €	24.652,50 €
XESTIÓN DE INFORMES	8.125,00 €	4.512,50 €
TOTAL	225.000,00 €	125.000,00 €

A achega imputarase á aplicación orzamentaria 09.A1.741A.6403 para o ano 2019.

- Facilitar os datos que considere relevantes para a súa difusión e aqueles outros que sexan solicitados pola empresa e poderá formular en relación cos datos e informacións as observacións que considere pertinentes co fin de garantir a obxectividade e veracidade destes.

Serán obrigas da Corporación Voz de Galicia, S.L.U.:

- Configuración dunha plataforma dixital desde a que se difundan todos os contidos que se consideren de interese. De xeito complementario, as principais noticias que se recollan na plataforma deberán ter un espazo propio no resto de medios de comunicación dos que dispón a Corporación Voz de Galicia, cunha publicación semanal dunha noticia nas edicións en papel e unha emisión semanal dun espazo radiofónico de entre 3 e 5 minutos a nivel autonómico e/eu nas emisoras locais.
- Ter en consideración as observacións que formule o Igape en relación cos datos e informacións a publicar co fin de garantir a obxectividade e veracidade destes.
- Xustificar os gastos derivados deste convenio no prazo e forma sinalados na cláusula sexta.
- Subministrar toda a información necesaria para que o Igape poida dar cumprimento ás obrigas previstas no Título I da Lei 1/2016, do 18 de xaneiro, de transparencia e bo goberno. As consecuencias do incumprimento desta obriga serán as establecidas no artigo 4.4 da citada lei.

QUINTA.- DURACIÓN

Este convenio terá unha duración desde a súa sinatura ata o 31 de decembro de 2019 e non será susceptible de prórroga. Non obstante o convenio extinguirase por cumprimento se a totalidade do seu obxecto se realizou con anterioridade a tal prazo.

SEXTA.- XUSTIFICACIÓN DOS GASTOS

Para acreditar o cumprimento das cláusulas deste convenio, a Corporación Voz de Galicia, S.L.U. entregará ao Igape, antes do 20 de decembro de 2019 a seguinte documentación:

- Un certificado asinado pola persoa responsable onde se exprese que por parte da sociedade se realizou a totalidade do obxecto do convenio.
- Unha memoria xustificativa das actuacións realizadas, na que se indicará a materia competencia do Igape sobre a que versou a actuación e se acompañará dunha copia dos contidos editados e publicados polo medio en cuestión.
- Certificacións de estar ao corrente das obrigas tributarias, coa comunidade autónoma de Galicia e coa Seguridade Social, ou autorización para que a Xerencia do Igape realice estas consultas polos seus propios medios.



- Declaración da titularidade da conta bancaria onde se debe realizar o pagamento.

O Igape aboará a contía fixada na cláusula cuarta contra presentación pola Corporación Voz de Galicia, S.L.U. da factura correspondente e trala conformidade da Secretaría Xeral do cumprimento das obrigas.

A factura ou facturas expediranse a nome do Instituto Galego de Promoción Económica (NIF: Q6550010J) e deberán de reunir os requisitos previstos no RD 1619/2012, do 30 de novembro, polo que se aproba o Regulamento no que se regulan as obrigas de facturación.

A factura ou facturas presentaranse en formato electrónico a través do sistema electrónico de facturación da Xunta de Galicia regulado na Orde do 26 de febreiro de 2015 pola que se regulan o Punto xeral de entrada de facturas electrónicas e o Rexistro Contable de Facturas da Comunidade Autónoma de Galicia (DOG nº 50, do 13/03/2015). O acceso ao sistema de facturación electrónica e á información sobre el realizarase a través das seguintes URL: <http://conselleriadefacenda.es/factura> ou <http://www.conselleriadefacenda.es/sicon/>.

En todo caso, o Igape resérvase o dereito de solicitar toda a documentación que se considere precisa en relación coa realización das actuacións obxecto do convenio e calquera outra que considere oportuna para a correcta xustificación do gasto e do seu pagamento.

Procederase a minorar a achega económica concedida cando as actuacións desenvolvidas e xustificadas ao abeiro deste convenio teñan un custo inferior ao importe total total do orzamento estimativo que presentou a entidade e sempre que esta minoración non supoña unha realización deficiente das actuacións.

Corporación Voz de Galicia, S.L.U. manterá a disposición do Igape ou de calquera organismo público con capacidade de fiscalización da Comunidade Autónoma de Galicia, tales como Intervención Xeral, o Tribunal de Contas e o Consello de Contas, todos os xustificantes dos gastos e ingresos obtidos a fin dunha verificación in situ, ben por medios propios ou mediante auditor externo.

SÉTIMA.- SEGUIMIENTO DO CONVENIO

Para o seguimento do convenio créase unha comisión constituída do seguinte xeito:

Polo Igape:

- O/a xerente ou persoa en quen delegue
- O subdirector de Coordinación ou persoa en quen delegue

Pola Corporación Voz de Galicia, S.L.U.:

- O/a seu/súa xerente
- O/a director/a do xornal

Esta Comisión actuará como órgano de vixilancia, seguimento e control do establecido neste convenio.

O funcionamento da Comisión farase ao abeiro do réxime xurídico dos órganos colexiados contido na sección III, do capítulo I do título I (artigos 15 e seguintes) da Lei 16/2010, do 17 de decembro, de organización e funcionamento da Administración Xeral e do sector público autonómico de Galicia.

OITAVA. PROTECCIÓN DE DATOS DE CARÁCTER PERSOAL

De acordo co Regulamento (UE) 2016/679 do Parlamento Europeo e do Consello do 27 de abril de 2016 relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos) (DOUE L 119 do 4.5.2016), se Igape accede a datos de carácter persoal contidos en ficheiros titularidade das Asociacións, adquire a condición de encargado do tratamento e comprométense a:



- Non utilizar nin tratar datos de carácter persoal con finalidade distinta á execución do convenio, non comunicar os datos baixo ningún concepto a terceiras persoas, nin sequera para a súa conservación, e, en especial, non reproducir, nin publicar, nin difundir ningunha información acerca dos datos.
- Garantir o cumprimento das medidas de seguridade establecidas, así como a súa correcta implementación.
- Ao termo da relación, por calquera causa, os datos de carácter persoal aos que tivesen tido acceso as restantes partes, deben ser destruídos ou devolverse ás Asociacións, incluíndo calquera soporte ou documento. O incumprimento destas obrigas fai responder a Igape das infraccións que cometa coma se ocupase a posición de responsable do tratamento.

O IGAPE responden fronte a Corporación Voz de Galicia, S.L.U do cumprimento destas obrigas polas persoas de IGAPE que participen de calquera modo na execución do convenio.

NOVENA.- INEXISTENCIA DE RELACIÓN LABORAL

A subscrición do convenio non leva consigo relación laboral, contractual ou de calquera outro tipo entre os profesionais que vaian desenvolver as actividades e o Igape, de tal xeito que non se lle poderá exixir a este Instituto ningunha responsabilidade, nin directa nin indirecta, nin subsidiaria polos actos ou feitos que xurdan no seu desenvolvemento.

DÉCIMA.- ALTERACIÓN DAS ACTUACIÓNS OBXECTO DO CONVENIO

Toda alteración nas accións a realizar deberá ser obxecto de autorización polo Igape e formalizarse mediante a correspondente addenda a este convenio.

En aplicación do disposto no artigo 31.4 da Lei 14/2013, do 26 de decembro, de racionalización do sector público autonómico o convenio poderá modificarse coa finalidade de lograr os obxectivos de estabilidade orzamentaria e sustentabilidade financeira. As devanditas modificacións terán por obxecto a redución do volume das actuacións a desenvolver, coa correspondente minoración orzamentaria, ou a ampliación do prazo de execución.

DÉCIMO PRIMEIRA.- EXTINCIÓN DO CONVENIO

O convenio extínguese polo cumprimento das actuacións que constitúen o seu obxecto ou por incorrer nalgunha das seguintes causa de resolución:

O transcurso do seu prazo de vixencia.

- O acordo unánime dos asinantes.
- O incumprimento das obrigas e compromisos asumidos por parte dalgún dos asinantes.

Neste caso, calquera das partes poderá dirixir á parte non cumpridora un requirimento para que no prazo de dez días hábiles asuma as obrigas ou compromisos que se consideren incumplidos. Este requirimento será comunicado tamén á comisión de seguimento do convenio. Se transcorrido o prazo indicado no requirimento persistira o incumprimento, a parte que o dirixiu notificará a outra parte asinante a concorrencia da causa de resolución e entenderase resolto o convenio.

- Por decisión xudicial declaratoria da nulidade do convenio.
- Por calquera outra causa distinta das anteriores prevista no convenio ou noutras leis.

Se cando concorra calquera das causas de resolución do convenio existen actuacións en curso de execución, as partes, a proposta da Comisión de Seguimento do convenio, poderán acordar a continuación e finalización das actuacións en curso que consideren oportunas, establecendo un prazo improrrogable para a súa finalización, transcorrido o cal deberá realizarse a liquidación das mesmas.



DÉCIMO SEGUNDA.- AUTORIZACIÓNS

Corporación Voz de Galicia, S.L.U., consente expresamente a inclusión dos datos relevantes e persoais deste convenio nos rexistros públicos que proceda, de acordo co Decreto 126/2006, do 20 de xullo, así como poderá exercer os seus dereitos de acceso, rectificación, cancelación e oposición respecto do contido dos rexistros antes citados, ante a Dirección Xeral do Instituto Galego de Promoción Económica, sito no Complexo Administrativo de San Lázaro s/n, 15707 Santiago de Compostela, en aplicación do disposto no Decreto 126/2006.

Este consentimento esténdese a autorización para a cesión dos seus datos á entidade financeira na que se aboe o pagamento, ao *Diario Oficial de Galicia* e ás demais cesións previstas na lei.

Tamén comporta a autorización ao IGAPE para solicitar as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda da Xunta de Galicia, no caso de que se deban presentar estes certificados en fase de emenda, logo de que a consulta polo IGAPE non obtivese resultado favorable, a data de expedición dos certificados pola Administración correspondente deberá ser posterior á data de consulta polo IGAPE, o que se comunicará no requirimento de emenda da documentación.

DÉCIMO TERCEIRA.- PUBLICIDADE DO CONVENIO

Estarase co disposto no artigo 15 da Lei 1/2016, do 18 de xaneiro, de transparencia e bo goberno, sobre obrigas específicas de información sobre convenios. A sinatura do convenio leva implícita a autorización para o tratamento necesario dos datos e a referida publicidade.

Asemade procederase á inscrición do convenio no Rexistro de Convenios da Xunta de Galicia, de conformidade co establecido no artigo 5 do Decreto 126/2006, do 20 de xullo, polo que se regula o Rexistro de Convenios da Xunta de Galicia.

DÉCIMO CUARTA.- RÉXIME XURÍDICO E RESOLUCIÓN DE CONTROVERSIAS

O convenio rexeráse polas súas propias cláusulas, pola Lei 40/2015, do 1 de outubro, de réxime xurídico do sector público e pola Lei 1/2016, do 18 de xaneiro, de transparencia e bo goberno de Galicia.

Este convenio queda excluído do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE do 26 de febreiro de 2014, en virtude do establecido no seu artigo 6.2, sen prexuízo da aplicación dos principios do devandito texto normativo para resolver as dúbidas e lagoas que puideran presentarse.

As cuestións litixiosas xurdidas sobre a interpretación, a modificación, a resolución e os efectos que puideran derivarse da aplicación do convenio deberán resolverse pola comisión de seguimento á que se refire a cláusula sétima deste convenio. Se non se puidese acadar un acordo, as posibles cuestións litixiosas serán de coñecemento e competencia da orde xurisdiccional contenciosa-administrativa.

DÉCIMO QUINTA. NORMATIVA APLICABLE

Para todo o non previsto neste convenio aplicarase o previsto no acordo do Consello da Xunta de Galicia do 27 de marzo de 1991 (DOG do 30 de abril), sobre subscripción dos convenios de colaboración con particulares que outorguen as Consellerías da Xunta de Galicia, os Organismos Autónomos ou Entes de dereito público da Administración Autonómica, a Lei 1/2016, do 18 de xaneiro, de transparencia e bo goberno e o Decreto 126/2006 do 20 de xullo polo que se regula o Rexistro de Convenios da Xunta de Galicia. Será tamén de



aplicación o disposto no capítulo VI do título preliminar da Lei 40/2015, do 1 de outubro, de Réxime Xurídico do Sector Público, polo que se regulan os convenios do sector público.

E en proba de conformidade, as partes asinan o presente convenio en duplicado exemplar, no lugar e data indicados no encabezamento.

Polo IGAPE

Pola Corporación Voz de Galicia, S.L.U.

Juan Manuel Cividanes Roger

Luis Miguel Blanco Penas